

劉賓客文集

冊一

劉賓客文集

四結謝聖

四部備要

集部

上海中華書局據劉氏刻

本校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

劉賓客文集卷第一

正議大夫檢校禮部尚書兼太子賓客贈兵部尚書劉 禹錫

賦

問大鈞賦

砥石賦

楚望賦

傷往賦

何卜賦

謫九年賦

望賦

山陽城賦

秋聲賦

問大鈞賦

并序

始余失臺郎爲刺史又貶州司馬俟罪朗州三見閏月人咸謂數之極理當遷焉因作謫九年賦以自廣是歲臘月詔追明年自闕下重領連山郡印綬人咸曰美惡周必復第行無恤歲杪其復乎居三年不得調歲二月有事于社前一日致齋孤居慮靜滯念歛起伊人理之不可以曉也將質諸神乎謹貢誠馳精敢問大鈞其夕有遇寤而次第其詞以爲賦

圓方相函兮浩其無垠窅冥翕闢兮走三辰以騰振孰主張是令有工其神迎

隨不見兮強名之曰大鈞鼓以臨下兮魏兮雄尊天爲獨陽高不可問工居其中與人差近身執其權心平其運循名想像斯可以訊曰嘻蒙之未生其猶泥耳落乎埏埴唯鈞所指忽然爲人爲幸大矣工賦其形七情與俱嗇智不授畀之以愚坦坦之衢萬人所趨蒙一布武化爲畏途人或譽平聲之百說徒虛人或排之半言有餘物壯則老乃唯其常否終則傾亦不可長老先期而驟至今否踰數而叵量雖一夫之不獲兮亦大化之攸病謹薦誠上問兮俛伏以聽是夕寢熟夢遊兮無何有之鄉抗陞級于重霄兮異人閒之景光中有威神兮金甲而煒煌頷之使前兮其音琅琅曰吾大化之一工也居上臨下廉其不平汝今有辭吾一以聽播形肖貌生類積億橐籥圈匡鎔鍊消息我之司智初不爾嗇不守以愚覆爲汝賊旣賦汝形輔之聰明盍求世師資適攸宜胡然抗志遐想前烈倚梯青冥舉足斯跌韜爾智斧無爲自伐鑿竅太繁天和乃洩利逕前誘多逢覆轍名腸內煎外火非熱今哀汝窮將厚汝愚剔去剛健納之柔濡塞前竅之傷痕兮招太和而與居恕以待人兮急以自拘道存邃奧無示四隅軋物

之勢不作兮見傷之機自無汝不善用吾焉嗇乎且夫貞而騰氣者膺膺健而垂精者昊昊我居其中猶輪是蹈以不息爲體以日新爲道俾鱗蜚走灌莽苞阜乃牙乃甲乃殪乃剖陽榮陰悴生濡死藁各乘氣化不以意造賦大運兮無有淑慝彼多方兮自生醜好爾奚不德余以驟壯姑尤我以速老邪觀汝百爲又或不然赤子哇哇急其能言亦旣名物幾時踟躕春耕其丘投種之日釋耒而歎何時實粟望所未至謂余舒舒欲其久留謂我譬如我一子二誰之曲歟彼蒹葭之蒼蒼兮霜霰苦而中堅松竹之皴皴索籜兮不若櫛筍之可憐納材輦而構明堂兮固容消而力完揚且之哲兮不可以常然當錫爾以老成蒼眉皓髯山立時行去敵氣與矜色兮噤危言以端誠俾人望之侮黷不生爾之所得孰與壯多不善處老問余而何受教而回遽遽形開嚮之威神孰爲來哉乃遽衣促盥端慮滌想委佩低簪持簿叩顙而言曰楚臣天問不訓今臣過幸一獻三售始厚以愚終期以壽忘上問之罪濯已然之咎心憎故術腹飽新授馳神清玄拜手稽首

砥石賦

并序

時在朗州

南方氣泄而雨淫地慝而傷物媼神噫淫淪色壤味雖金之堅亦失恆性始余有佩刀甚良至是澀不可拔剖其室乃出遡陽眇眇傳刃蒙脊鱗然如瘡痂如黑子如青蠅之惡銳氣中錮猶人被病然客有聞焉裹密石以遺予沃之草腴雜以烏膏切磨下上真質焯見躊躇四顧道奈周切爾謝客微子之貽幾喪吾寶客曰吾聞諸梅福曰爵祿者天下之砥石也高皇帝所以礪世磨鈍有是耶余退感其言作砥石賦

我有利金兮以利爲佩遭土卑而慝作兮雄銚爲之潛晦如景昏而蝕既兮與肌漆而爲癘顧秋蓬之不可剗兮尙可遊乎臆髀之外利物蒙蔽材人惆悵俾百汰之至精播一檢而多恙豈害氣之獨然兮將久不試而然彼屠者之刃兮獵者之鋌不灌不淬兮揉錯銜鉛日鼓月揮兮剗腴擊鮮晚燿燿以耀芒翦淫夷而騰羶豈不涉暑而蒙沴兮鼎用之而成妍有客自東遺余越砥圭形石質蒼色膩理刻其鱗皴滑以滌髓如衣澣垢如鼎出否霧盡披天萍開見水拭寒

燄以破皆擊清音而振耳故態復還寶心再起旣賦形而終用一蒙垢焉何恥
感利鈍之有時兮寄雄心於瞪視嗟乎石以砥焉化鈍爲利法以砥焉化愚爲
智武王得之商俗以厚高帝得之傑材以湊得旣有自失豈無因漢氏以還三
光景分隨道闊狹用之得人五百餘年唐風始振懸此天砥以礪兆民播生在
天成器在君天爲物天君爲人天安有執礪世之具而患乎無賢歟

楚望賦

并序

予旣謫于武陵其地故郢之裔邑與夜郎諸夷錯雜繫乎天者陰伏陽驕是已
繫乎人者風巫氣竄是已囂霧浮浮利于樓居城之麗譙實鄰所舍四垂無蔽
萬景全入因道其遠邇所得爲楚望賦云

翼軫之野祝融司方陰迫而專專實生沴天濡而零土洩而泥氣罕淑清兮淫
氛曠曠中人支體兮爲瘡爲瘵以廣滌煩兮利居高于物外我卜我居于城之
隅宛在藩落麗譙渠渠四阿垂空洞戶發樞眸子不運坐陵虛無歲更周流時
極慘舒萬象起滅森來貺予櫺軒之外羣山龍從岡陵靡陀勢若相拱出雲見

怪竊蔚森聳露夕霞朝望如飛動簷廡之下大江傾洞支流合輸泄入雲夢義
和望舒出沒兩涯涵泳之族聳牙歔呀秋水灌盈旋石飄沙流枿軒昂舞于盤
渦逮及收潦澹如醪醕白石磷磷倒影羅生蘋末風起有文無聲悠遠煙絲與
空蒼然湘沅之春先令而行臘月寒盡溫風發榮土膏如濡言鳥嚶嚶三星嘒
其晚中植物颯以飄英雲歸高唐草蔽洞庭日與天盡神將化并圓方相涵遊
氣杳冥熙熙藹藹藻飾羣形枿樹童立積空凝青環洲曲塘含景曜明恢台之
氣發于春季涉夏如鑠逮秋愈熾土山焦熬止水瀟沸翔禽跼墮呀咻垂翅曦
赫歆蒸陽極反陰二儀交精下上相歆雲興天際欸若車蓋凝矚未瞬瀾漫灑
霽驚雷出火喬木糜碎殷地熱空萬夫皆廢懸霽綆緹日中見昧移晷而收野
無完塊少陰之中景物激鮮丹葉星房燭耀川原夕月旣望曜于丹泉上鏡下
冰湔塵濯煙宿麗潛芒獨行高躔皓一氣之悠然潔有形而溢清玄杳微明而
斐亶想遊目於化先夜無朕以徂征金霞暈乎海壖明星方揚斜漢西懸璿柄
如墮半沈層瀾雞啁晰而晨鳴今日荏苒以騰晶動植瞭兮已分山川鬱乎不

平復人寰之喧卑洶浩浩以營營追向時之景光不可驟得以再更意華胥之

夢還獨仿像而馳精日次于房天未降霜百卉猶澤水泉收脈故道脰音削衍

爲廣斥水禽嬉戲引吭伸翮紛驚鳴而決起捨綵翠于沙礫時時北風振槁揚

埃蕭條邊聲與雁俱來寒氛委積萬竅交激楚雲改容飛雨凝滴灑林遞響淅

瀝梢械飛電照雪以騰光柔疏傲霜而秀坼躔次殊氣川谷異宜民生其閒俗

鬼言夷招三閭以成謠德伏波而構祠投粃妝尼呂反以鼓檝蒙鱸魴而如犧蟠

木覲深孽祆憑之祈年祛癘蠲敬祗威擊鼓肆筵河旁水湄薦誠致祝却略躡

踞躡踞龍動貌見靈光賦渚居蠱食大掩水物罟張餌啗不可遁伏顯舉潛維晝撞夜觸

設機沈深如拾于陸彼遊儵之瑣類咸跳脫於窘束雖三趾與六眸時或加乎

一目亦有輕舟軒輊泛浮枕綸往復馴鷗相逐暮夜澹寂嘯歌羣族儉音俚態

幽怨委曲逗疏析於江城引哀猿於山木巢山之徒梓木開田灼龜伺澤兆食

而燔鬱攸起于巖阿騰絳氣而蔽天熏歇雨濡穎垂林巔盜天和而藉地勢諒

無勞而有年罷士閑人逸爲末作求金渚涖淘汰灑灑流注瀦沱繁光熠燿貪

賈來貿發於懷握無翼而飛潤于豐屋晒耕耘之悵悵徒胼胝以自鞠我處層
軒日星回還閱天數而視民風百態變見乎其閒非耳剽以臆說今固幽永而
縱觀觀物之餘遂觀我生何廣覆與厚載豈有形而無情高莫高今九闔遠莫
遠今故園舟有楫兮車有轄江山坐兮不可越吾又安知其所如悅臨高以觀
物

傷往賦

并序

人之所以取貴於飛走者情也而誕者以遣情爲智豈至言耶予授室九年而
鰥痛苦人之天閼弗遂也作賦以傷之冀夫覽者有以增伉儷之重云

歎獨處之悵悵兮憤伊人之我遺情可殺而猶毒境當歡而復悲人或朝歎而
暮息夫何越月而逾時太極運乎三辰轉寒暑而下馳有歸於無兮盛復于衰
猶昧爽之必暮又安得而怨咨我今怨夫若人兮曾旭旦而潛暉飄零日及之
萼

日及權也朝生暮落一名王蒸爾雅

倏忽蜉蝣之衣川走下而不還露迎暘而易晞恩已甚兮

難絕見無期兮永思我行其野農民桑者舉桡來鱣亦在林下我觀于途裨販

之夫同荷均掣荆釵布襦羽毛之蕃鱗介之微和鳴灌叢雙泳漣漪薨薨伊蟲
蠢蠢伊豸遊空穴深兩兩相比何動類之萬殊必雄雌而與俱物莫失儷以孤
處我方踽踽而焉如我復虛室目淒涼兮心伊鬱心伊鬱兮將語誰坐匡牀兮
撫嬰兒何所勾沐兮何從仰飴襦袴在身兮昔圍差跌輦囊附臂兮餘馥葳蕤
誠天性之潛感顧童心兮如疑曉然有難繼之慕漠然滅好弄之姿指遺桂兮
能認遡空帷兮欲歸我入寢宮痛人亡兮物改其容寶瑟僵兮弦柱絕瑤臺傾
兮鏡奩空寒鑪委灰虛幌多風隙駟晨轉窗蟾夜通步搖昏兮網黏翡翠芳褥
掩兮塵化蛩蛩閱刀尺之餘澤見巾箱之故封玩服儼兮猶具繁華謝兮焉從
想翩躚於是非求僊竚與冥蒙信奇術之可致嗟此生兮不逢徒注視以寂聽
恍神疲而目窮還抱影以獨出紛百哀而攻中系曰

龍門風霜苦別鶴哀鳴夜銜羽吳江波浪深雌劍一去無遺音悲之來兮憤予
心洵如行波洊浸淫悵緣情而莫極思執禮以自箴已焉哉冉冉生死悠悠古
今乘彼一氣兮聚散相尋或鼓而興或罷而沈以無涯之情愛悼不駐之光陰

諒自迷其有分徒終怨於匪忱彼蒙莊兮何人予獨累歎而長吟

何卜賦

余旣幻惑力命之說兮身久放而愈疑心回寃其莫曉兮將取質夫東龜楚人俗巫而好術兮叟有鬻卜而來思乃招而祝之曰嘻人莫不塞有時而通伊我今久而愈窮人莫不病有時而閒伊我今久而滋蔓吾聞人肖五行動止有則四時轉續變於所極一歲之旱人思具舟三月之熱人思具裘極必反焉其猶合符予首圓而足方予腹陰而背陽胡形象之有肖而變化之殊常經曰剝極則賁居賁而未嘗剝者其誰否極受泰居否而未嘗泰者又其誰鶴胡不截鳧胡不裨夔何罰而蹠蹕虻何功而扶持紛紜恣睢交作舛馳似予似奪似信似欺孰主張之問于予龜卜者曰招我以粗問我以微有天下之是非有人人之是非在此爲美兮在彼爲蚩或昔而成或今而虧君問曷由主張其時時乎時乎去不可邀來不可逃淹淹兮孰捨孰操烏喙之毒董雞首之賤毛各於其時而伯音霸其曹屠龍之伎非曰不偉時無所用莫若履絺作俑之工非曰可珍時

有所用貴於斲輪絡首縻足兮驥不能踰跬前無所阻兮跛鼈千里同涉于川
其時在風沿者之吉沂者之凶同藝于野其時在澤伊穉之利乃穆之厄故曰
是耶非耶主者時耶諒淑惡之同出兮顧所丁之若何夫如是得非我美失非
我恥其去曷思其來曷期姑蹈常而俟之夫何卜爲言訖執龜而起予退而作
何卜賦於是蹈道之心一而俟時之志堅內視羣疑猶冰釋然

謫九年賦

古稱思婦已歷九秋未必有是舉爲深愁莫高者天莫濬者泉推以極數無踰
九焉伊我之謫至於數極長沙之悲三倍其時廷尉不調行當跂而天有寒暑
閏餘三變朝有考績明幽三見顧堯之明兮亦昏墊而有數歎息兮徜徉登高
高兮望蒼蒼突弁之夫我來始黃合抱之木我來猶芒山增昔容水改故坊童
者鬱鬱兮而涸者洋洋天覆地生翦兮無傷彼族而居鄉之投荒彼軒而遊昨
日桁楊信及澤濡俄然復常稽天道與人紀咸一償而一起去無久而不還焚
無久而不理何吾道之一窮兮貫九年而猶爾噫不可得而知庸詎得而悲苟

變化之莫及兮又安用夫肖天地之形爲

望賦

邈不語兮臨風境自外兮感從中晦明轉續兮八極鴻濛上下交氣兮羣生異容發孤照於寸眸驚遐情乎太空物乘化兮多象人遇時兮不同嗟乎有目者必騁望以盡意當望者必緣情而感時有待者瞿瞿忘懷者熙熙慮深者瞠然若喪樂極者沖然無違外徙倚其如一中糾紛兮若迷望如何其望最樂晞慶霄兮窺阿閣如雲兮天顏咫尺如草兮臣心踊躍扇交翟兮歲蕤旗升龍兮蠖略日轉黃道天開碧落凝瑞景於庭樹掬非煙於殿幕望如何其望且懽登瀛岸兮見長安紛擾擾兮紅塵合鬱蔥蔥兮佳氣盤池象漢兮昭回城依斗兮闌干避御史之驄馬逐倖臣之金丸望如何其望攸好宗萬靈兮越四隩漢帝仙臺兮秦皇海嶠霓衣踊于河上馬跡窮于越徼紫氣度關而斐亶神光屬天而照耀睨眷眷以馳精聳專專而觀妙望如何其望有形視蠢蠢兮窮冥冥楚塞氛惡兮蕭關燧明暈籠孤月兮角奮長庚沙多似雪磧有疑城煙雲非女子之

氣草木盡王者之兵審曳柴之虛警破來騎之先聲信有得於風馬示無言於
旆旌望如何其望且慕恩意隔今年光度雕輦已辭兮金屋何處長信草生兮
長門日暮倏翠華之儻來仰玄天以自訴況復湘水無還漳河空注淚染枝葉
香餘紉素風蕭蕭兮北渚波煙漠漠兮西陵樹夫不歸兮江上石子可見兮秦
原墓拍琴翻朔塞之音挾瑟指邯鄲之路望如何其望最傷俟環玦兮思帝鄉
龍門不見兮雲霧蒼蒼喬木何許兮山高水長春之氣兮悅萬族獨含嘯兮千
里目秋之景兮懸清光偏結憤兮九回腸羨環拱於白榆惜馳暉於落桑諒衝
斗兮誰見伊戴盆兮何望平聲豈止蘇武在胡管寧浮海送飛鴻之滅沒附陰火
之光彩鶴頸長引烏頭未改恨已極兮平原空起何時兮在山東永望如何傷
懷孔多降將有依風之感宮人成憶月之歌歌曰張衡側身愁思久王粲登樓
日回首不作渭濱垂釣臣羞爲洛陽拜塵友

百韻山陽城賦

并序

山陽故城遺趾數雉四百之運終於此墟裔孫作賦蓋閔漢也詞曰

我止行車竇涕于山陽之墟是何蒼莽與慘惻春陵之氣兮焉如踣昌運於四百辭至尊而伍匹夫有利器而倒持兮曾何芒刃之足舒懿王迹之肇基暨坤維之再敷邈汜陽與鄘上悅蛇變而龍攄痛人亡而事替終此地焉忽諸嗟乎積是爲治積非成虐文景之欲處身以約播其德芽迄武乃穫桓靈之欲縱心於昏然其妖醖逮獻而焚彼伊周不世兮奸雄乘釁而騰振物象濯以易位被虛號而陽尊終勢殫而事去胡竊揖讓以爲文嗚呼維神器之至重兮蓋如山之不騫使人得譬乎逐鹿固健步者所先諒人事之云爾孰云當塗之兆也自天亂日久矣莫可追陞彼墟兮噫嘻躅遺武兮貽後王之元龜

秋聲賦

并序

相國中山公賦秋聲以屬天官太常伯唱和俱絕然皆得時行道之餘興猶動光陰之歎沉伊鬱老病者乎吟之斐然以寄孤憤
碧天如水兮窅窅悠悠百蟲迎莫兮萬葉吟秋欲辭林而蕭颯潛命侶以啁啾
送將歸兮臨水非吾土兮登樓晚枝多露蟬之思夕草起寒蜚之愁至若松竹